

金剛般若波羅蜜經論卷上

亦名金剛
能斷般若

受五

無 著 菩 薩 造

隋南天竺三藏法師達摩笈多譯

出生佛法無與等 顯了法界最第一

金剛難壞句義聚 一切聖人不能入

此小金剛波羅蜜 以如是名顯勢力

智者所說教及義 聞已轉為我等說

歸命彼類及此輩 皆以正心而頂禮

我應精勤立彼義 解釋相續為自他

論曰成立七種義句已此般若波羅蜜即得

成立七義句者一種性不斷二發起行相三
行所住處四對治五不失六地七立名此等

七義於般若波羅蜜經中成立故名義句於

中前六義句顯示菩薩所作究竟第七義句

顯示成立此法門故應如是知此般若波羅

受五

蜜為佛種不斷故流行於世為顯此當得佛

種不斷義故上座須菩提最初經云白佛言

希有世尊如來應供正徧知善護念諸菩薩

善付囑諸菩薩如是等

二發起行相者如經云何菩薩大乘中發阿

轉多羅三藐三菩提心如是等

三行所住處者謂彼發起行相所住處也此復有十八種應知

一發心經言諸菩薩生如是心所有一切衆生如是等二波羅蜜相應行經言不住於事

行於布施如是等三欲得色身經言須菩提於意云何可以相成就見如來不如是等四欲得法身經言須菩提白佛言世尊頗有衆生於未來世如是等五於修道得勝中無慢經言須陀洹能作是念如是等六不離佛出

時經言於意云何如來昔在然燈佛所如是等七願淨佛土經言須菩提若菩薩作是言我莊嚴佛國土如是等八成熟衆生經言須菩提譬如有人身如須彌山王如是等九遠離隨順外論散亂經言須菩提於意云何如恒河中所有沙數如是等十色及衆生身搏取中觀破相應行經言須菩提於意云何三千大千世界所有微塵如是等十一供養給侍如來經言須菩提於意云何可以三十二大人相見如來不如是等十二遠離利養及

疲乏熱惱故不起精進及退失等經言須菩提若善男子善女人以恒河沙等身如是等十三忍苦經言如來說忍波羅蜜如是等十四離寂靜味經言須菩提若善男子善女人能於此法門受持讀誦修行如是等十五於證道時遠離喜動經言世尊云何菩薩發阿耨多羅三藐三菩提心如是等十六求教授經言於意云何如來於然燈佛所有法得阿耨多羅三藐三菩提如是等十七證道經言譬如有人其身妙大如是等十八上求佛地

經言須菩提若菩薩作是言我莊嚴佛國土是不名菩薩如是等

彼住處等略爲八種亦得滿足一攝住處二波羅蜜淨住處三欲住處四離障礙住處五淨心住處六究竟住處七廣大住處八甚深住處於中攝住處者謂發心波羅蜜淨住處者謂波羅蜜相應行欲住處者謂欲得色身法身離障礙住處者謂餘十二種淨心住處者謂證道究竟住處者謂上求佛地廣大及甚深住處者通一切住處於初住處中若說

四五

三

菩薩應生如是心所有衆生如是等此爲廣大又復說言若菩薩有衆生相如是等此爲甚深於第二住處中若說菩薩不住於事行於布施如是等此爲甚深若復說言彼所有福聚不可思量如是等此爲廣大如是於餘住處中廣大甚深等隨所相應應知已說住處四對治者彼如是相應行相行諸住處時有二種對治應知一邪行二共見正行此中見者謂分別也於初住處中若說菩薩應生如是心所有衆生等此是邪行對治生如是

心是菩薩邪行若復說言若菩薩有衆生想等此爲共見正行對治此分別執菩薩亦應斷謂我應滅度衆生故於第二住處中若說應行布施此爲邪行對治非於布施是菩薩邪行若復說言住於事等此是共見正行對治此分別執菩薩亦應斷謂應行布施故五不失者謂離二邊云何二邊謂增益邊損減邊若於如言辭法中分別執有自性是增益邊若於法無我事中而執爲無是損減邊於中若說言世尊若福聚非聚此遮增益邊

以無彼福聚分別自性故若復說言是故如
來說福聚此遮損減邊彼不如言辭有自性
而有可說事以如來說福聚故此得顯示如
是須菩提佛法佛法者如來說非佛法者此
遮增益邊是名佛法者此遮損減邊於中如
來說非佛法者顯示不失義是名佛法者顯
示相應義何者是相應若佛法如說有自性
者則如來不說佛法以雖不說亦自知故是
故無有自性爲世諦故如來說名佛法如是
於一切處顯示不共及相應義應知復次佛

法者攝波羅蜜事及念處等菩提分應知菩
薩離此二邊故於彼對治不復更失故名不
失

六地者此地有三種謂信行地淨心地如來
地於中前十六處顯示信行地證道住處是
淨心地後上求佛地

七立名名金剛能斷者此名有二義相應知
如說入正見行入邪見行故金剛者細牢故
細者智因故牢者不可壞故能斷者般若波
羅蜜中聞思修所斷如金剛斷處而斷故是

名金剛能斷

又如畫金剛形初後闊中則狹如是般若波羅蜜中狹者謂淨心地初後闊者謂信行地如來地此顯示不共義也彼五種義句上上依止應知彼等皆依止地故說

文五

五

經曰如是我聞一時婆伽婆在舍婆提城祇樹給孤獨園與大比丘衆千二百五十人俱爾時世尊食時著衣持鉢入舍婆提大城乞食於其城中次第乞食已還至本處飯食訖收衣鉢洗足已如常敷坐結跏趺坐端身而

住正念不動爾時諸比丘來詣佛所到已頂禮佛足右遶三匝退坐一面爾時慧命須菩提在大衆中即從坐起偏袒右肩右膝著地向佛合掌恭敬而立白佛言希有世尊如來應供正徧知善護念諸菩薩善付囑諸菩薩論曰修多羅身相續此義句今當說世尊何故以寂靜者威儀而坐也顯示唯寂靜者於法能覺能說故經言善攝第一菩薩摩訶薩者謂已熟菩薩於佛證正覺轉法輪時以五種義中菩薩法而建立故諸菩薩有七種大

故此大衆生名摩訶薩埵何者七種大一法
大三心大三信解大四淨心大五資糧大六
時大七果報大如菩薩地持中說於諸菩薩
所何者善攝何者第一也利樂相應爲善攝
第一有六種應知一時二差別三高大四牢
固五普徧六異相何者時現見法及未來故
彼菩薩善攝中樂者是現見法利者是未來
世何者差別於世間三摩鉢帝及出世聖者
聲聞獨覺等善攝中差別故何者高大此善
攝無有上故何者牢固謂畢竟故何者普徧

自然於自他身善攝何者異相於未淨菩薩
善攝中勝上故經言第一付囑者彼已得善
攝菩薩等於佛般涅槃時亦以彼五義如是
建立故何者第一付囑有六種因緣一入處
二法爾得三轉教四不失五悲六尊重何者
入處於善友所善付囑故何者法爾彼已得
善攝菩薩於他所法爾善攝何者轉教汝等
於餘菩薩應當善攝是名轉教此等三種如
其次第即是不失及悲尊重等應知此善攝
付囑二種顯示種性不斷

經曰世尊云何菩薩大乘中發阿耨多羅三藐三菩提心應云何住云何修行云何降伏其心

爾時佛告須菩提善哉善哉須菩提如汝所說如來善護念諸菩薩善付囑諸菩薩汝今諦聽當為汝說如菩薩大乘中發阿耨多羅三藐三菩提心應如是住如是修行如是降伏其心須菩提白佛言世尊如是願樂欲聞論曰此下第二發起行相何故上座須菩提問也有六因緣一為斷疑故二為起信解故

三為入甚深義故四為不退轉故五為生喜故六為正法久住故亦即是般若波羅蜜令佛種不斷云何以此令佛種不斷也若有疑者得斷故有樂福德而心未成熟諸菩薩等聞多福德於般若波羅蜜起信解故已成熟心者入甚深義故已得不輕賤者由貪受持修行有多功德不復退轉故已得順攝及淨心者於法自入及見生歡喜故能令未來世大乘教久住故者若略說疑者令見故樂福德及已成熟諸菩薩等攝受故已得不輕賤

者令精勤心故已得淨心者令歡喜故經言
應云何住者謂欲願故應修行者謂相應三
摩鉢帝故應降伏心者謂折伏散亂故於中
欲者正求也願者爲所求故作心思念也相
應三摩鉢帝者無分別三摩提也折伏散亂
者若彼三摩鉢帝心散制令還住也第一者
顯示攝道第二者顯示成就道第三者顯示
不失道何故唯問發行菩薩乘爲三種菩提
差別故以善問故於上座須菩提所應稱善
哉

經曰佛告須菩提諸菩薩生如是心所有一
切衆生衆生所攝若卵生若胎生若濕生若
化生若有色若無色若有想若無想若非有
想非無想所有衆生界衆生所攝我皆令入
無餘涅槃而滅度之如是滅度無量無邊衆
生實無衆生得滅度者何以故須菩提若菩
薩有衆生相即非菩薩何以故非須菩提若
菩薩起衆生相人相壽者相則不名菩薩
論曰自下第三行所住處訖盡經末有十八
門具如前說此中第一初明發心經言所有

衆生衆生所攝者總相說也。卵生等者差別說也。又受生依止境界所攝差別應知。卵生乃至化生者受生別也。若有色若無色者依止別也。若有想若無想若非有想非無想者境界所攝別故。所有衆生界衆生所攝者謂上種種想住衆生界佛施設說也。我皆令入分五無餘涅槃者何故願此不可得。義生所攝故無過以皆是生故。如所說卵生等生並入願數故。彼卵生濕生無想及非有想非無想等則不能云何能令一切衆生入涅槃也有三

因緣故一難處生者得時故二非難處生未成熟者成熟之故三已成熟者解脫之故何故說無餘涅槃界不直說涅槃若如是便與世尊所說初禪等方便涅槃不別故彼自以丈夫力故無佛亦得但非究竟何故不說有餘涅槃界彼共果故自以宿業又值佛說而得果故又非一向身苦有餘故如是涅槃及有餘涅槃等丈夫力果故共果故非究竟果故非一向果故是故說無餘如是无量衆生入涅槃已者顯示卵生等生一一無量故無

有衆生得涅槃者此何義如菩薩自得涅槃
無別衆生何以故若菩薩有衆生相即非菩
薩者此何義若菩薩於衆生所他想轉非自
體想不名菩薩故何以故若菩薩起衆生想
人想壽者想則不名菩薩者此何義若以煩
惱取衆生命人想轉彼則有我想受五及於衆生
中有衆生想轉菩薩於彼不轉已斷我見故
得自行行者謂五陰行平等相故信解自他平等彼
菩薩非衆生命人取見者此是其義復次經
言諸菩薩生如是心等者顯示菩薩應如是

住中欲願也若菩薩有衆生想即非菩薩者
顯示應如是修行中相應三摩鉢帝時也若
菩薩起衆生相人相壽者相則不名菩薩者
顯示應如是降伏心中攝散時也如菩薩相
應三摩鉢帝散時衆生想亦不轉如彼爾焰
相住故是故無有衆生得涅槃者此得成就
彼欲願者攝諸佳處爲最勝彼相應行相行
餘佳處時依止欲願決定得故此欲願義不
復重釋
經曰復次須菩提不住於事行於布施無所

住行於布施不住色布施不住聲香味觸法
布施須菩提菩薩應如是布施不住於相想
何以故若菩薩不住相布施其福德聚不可
思量須菩提於汝意云何東方虛空可思量
不須菩提言不也世尊佛言如是須菩提南
西北方四維上下虛空可思量不須菩提言
不也世尊佛言如是如是須菩提菩薩無住
相布施福德聚亦復如是不可思量佛復告
須菩提菩薩但應如是行於布施
論曰此下第二波羅蜜相應行自此後餘住

處中有五種隨所相應而解釋應知
一依義二說相三攝持四安立五顯現住處
對治為依義即彼住處為說相欲願為攝持
住處第一義為安立相應三摩提及攝散心
為顯現於波羅蜜淨住處中經言菩薩不住
於事行於布施此為依義顯示對治住著故
經言應行施者此為說相六波羅蜜六攝一
切檀那體性故檀那有三種一資生施者謂
檀那波羅蜜二無畏施者謂尸羅波羅蜜羣
提波羅蜜三法施者謂毗梨耶波羅蜜禪那

波羅蜜般若波羅蜜等若無精進於受法人
所爲說法時疲倦故不能說法若無禪定則
貪於信敬供養及不能忍寒熱逼惱故染心
說法若無智慧便顛倒說法多有過故不離
此三得成法施彼諸波羅蜜有二種果謂未
來現在未來果者檀那波羅蜜得大福報尸
羅波羅蜜得自身具足謂釋梵等羣提波羅
蜜得大伴助大眷屬毗離耶波羅蜜得果報
等不斷絕禪那波羅蜜得生身不可損壞般
若波羅蜜得諸根猛利及多諸悅樂於大人

衆中得自在等現在果者得一切信敬供養
及現法涅槃等於中若菩薩求未來果故行
施爲住事行施如所施物還得彼物果是故
經言不住於事行於布施若求未來尸羅等
果故行施爲有所住行施是故經言無所住
應行布施尸羅等果有與多不可分別故總
名有所住若求現在果信敬供養故行施爲
住色聲香味觸行施故經言不住色等若求
現法涅槃故行施爲住法行施故經言不住
於法應行布施又經言應行布施者即說攝

持施之欲願故經言不住行施者即此不住
爲安立第一義故於中以不住故顯示如所
有事第一義不住物等是所有事經言菩薩
應如是行施不住於相想者此爲顯示謂相
應三昧及攝散心於此二時不住相想如是
建立不住已或有菩薩貪福德故於此不堪
爲念堪故世尊顯示不住行施福聚甚多猶
如虛空有三因緣一徧一切處謂於住不住
相中福生故二寬廣高大殊勝故三無盡究
竟不窮故

經曰須菩提於意云何可以相成就見如來
不須菩提言不也世尊不可以相成就得見
如來何以故如來所說相即非相佛告須菩
提凡所有相皆是妄語若見諸相非相則非
妄語如是諸相非相則見如來

論曰此下第三欲得色身住處經言須菩提
於意云何可以相成就見如來不者此爲依
義應如顯示對治如來色身慢故經言相成
就者此爲說相顯示如來色身故上座須菩
提言不也爲成滿此義故世尊說須菩提凡

所有相皆是妄語即顯欲願於如是義中應攝持故及即是安立第一義於第一義中相成就爲虛妄非相成就不虛妄經言如是諸相非相則見如來者此爲顯現謂相應三昧及攝亂心時於彼相中非相見故

經曰須菩提白佛言世尊頗有衆生於未來世末世得聞如是修多羅章句生實相不佛告須菩提莫作是說頗有衆生於未來世末世得聞如是修多羅章句生實相不佛復告須菩提有未來世末世有菩薩摩訶薩法欲

滅時有持戒修福德智慧者於此修多羅章句能生信心以此爲實佛復告須菩提當知彼菩薩摩訶薩非於一佛二佛三四五佛所修行供養非於一佛二佛三四五佛所善根佛復告須菩提已於無量千萬諸佛所修行供養無量百千萬諸佛所種諸善根聞是修多羅乃至一念能生淨信須菩提如來悉知是諸衆生如來悉見是諸衆生須菩提是諸菩薩生如是無量福德聚取如是無量福德何以故須菩提是諸菩薩無復我相衆

生相人相壽者相須菩提是諸菩薩無法相亦非無法相無相亦非無相何以故須菩提是諸菩薩若取法相則為著我人衆生壽者須菩提若是菩薩有法相即著我相人相衆生相壽者相何以故須菩提不應取法非不取法以是義故如來常說揅喻法門是法應捨何況非法

論曰此下第四為欲得法身住處於中二種一言說法身二證得法身為欲得此言說法身故經言世尊頗有衆生於未來世末世得

聞如是修多羅章句等於中修多羅章句者謂所有義應知何者為句如上所說七種義句於不顛倒義想是謂實相應知如言執義彼非實相上座須菩提作是念於未來世無有生實相者為遮此故世尊言有正法欲滅時者謂修行漸滅時應知次後世尊為如是義顯示五種一顯示修行二顯示集因三顯示善友攝受四顯示攝福德相應五顯示實相中當得實想故經言有持戒修福德智慧者此增上戒等三學顯示修行功德少欲等

功德爲初乃至三摩提等經言已得供養無量百千諸佛乃至一心淨信等此顯示集因一心淨信尚得如是何況生實想也經言如來悉知悉見是諸衆生者此顯示善友所攝知者知名身見者見色身謂一切行住所作中知其心見其依止故經言生取無量福聚者此顯示攝福德生者福正起時故取者即彼滅時攝持種子故經言是諸菩薩無復我相衆生相乃至若是菩薩有法想即著我相人相衆生相壽者相者此顯示實想對治五

種邪取故何者五邪取一外道二內法凡夫及聲聞三增上慢菩薩四世間共想定五無想定第一者我等想轉第二法相轉第三者無淨想轉此猶有法取有法取者謂取無法故第四者有想轉第五者無想轉是諸菩薩於彼皆不轉也此中顯了有戒乃至當生無量福聚等經言何以故者此言是中邪取但法及非法想轉非我等想以我想及依止不轉故然於我想中隨眠不斷故則爲有我取是故經言是諸菩薩若取法想則爲著我等

取若無法想轉則爲有我取等此我等想轉中餘義猶未說經言若是菩薩有法相即著我等者於中取自體相續爲我想我所取爲衆生想謂我乃至壽住取爲命想展轉取餘趣取爲人想應知於中言當生實想者此爲依義應知顯示對治不實想故言於此修多羅章句說中者此爲說相顯示言說法身故即彼當生實想中言當生者是故願攝持故是諸菩薩無復我想轉等者是安立第一義須菩提不應取法非不取法者是顯了謂相

應三摩鉢帝及散心時不應取法者於法體及法無我並不分別又言說法身要義者經言以是義故如來常說椳喻法門若解此者法尚應捨何況非法故法尚應捨實想生故何況非法者理不應故略說顯示菩薩欲得言說法身不應作不實想故

十五

十五

經曰復次佛告慧命須菩提須菩提於意云何如來得阿耨多羅三藐三菩提耶如來有所說法耶須菩提言如我解佛所說義無有定法如來得阿耨多羅三藐三菩提亦無有

定法如來可說何以故如來所說法皆不可取不可說非法非非法何以故一切聖人皆以無爲法得名

論曰此下證得法身復有二種一智相法身二福相法身爲欲得智相至得法身住處故經言須菩提於意云何如來得阿耨多羅三藐三菩提耶此爲依義顯示翻於正覺菩提取故說法者正覺所攝故經言有法可說阿耨多羅三藐三菩提者是爲說相顯示至得法身故無有定法者上座須菩提道佛意故

世諦故有菩提及得是爲欲願攝持以方便故二俱爲有若如世尊意說者二俱無有爲顯此故經言如我解世尊所說義等又經言何以故如來所說法不可取不可說非法非非法者是安立第一義由說法故知得菩提故於說法中安立第一義於中不可取者謂正聞時不可說者謂演說時非法者分別性非非法者法無我故經言何以故以無爲故得名聖人者無爲者無分別義也是故菩薩有學得名無起無作中如來轉依名爲清淨

是故如來無學得名於中初無爲義者三摩鉢帝相應及折伏散亂時顯了故第二無爲唯第一義者無上覺故自此已後一切住處中皆顯以無爲故得名聖人應知前諸住處中未說無爲得名於此說阿耨多羅三藐三

文五

十六

菩提中無爲已竟

經曰須菩提於意云何若滿三千大千世界七寶以用布施須菩提於意云何是善男子善女人所得福德寧爲多不須菩提言甚多婆伽婆甚多修伽陀彼善男子善女人得福

甚多何以故世尊是福德聚即非福德聚是故如來說福德聚佛言須菩提共善男子善女人以滿三千大千世界七寶持用布施若復於此經中受持乃至四句偈等爲他人說其福勝彼無量不可數何以故須菩提一切諸佛阿耨多羅三藐三菩提法皆從此經出一切諸佛如來皆從此經生須菩提所謂佛法者即非佛法是名佛法
論曰此下福相法身爲欲得福相至得法身住處故經言於意云何若人滿三千大千世

界七寶以用布施等云何顯示即彼所有言
說法身出生如來福相至得法身於彼乃至
說一四句偈生福甚多況復如來所有福相
至得法身以何因緣於言說法身中如是說
一四句偈能生多福受五爲成就此義故經言何
以故如來阿耨多羅三藐三菩提十七從此出者
於中普集十法行阿含故諸佛世尊從此生
者世諦故言佛出生以有菩提故即此二並
故名爲佛法以菩提及佛故經言須菩提佛
法者即非佛法

復次經言其所生福勝彼無量阿僧祇者此
爲依義顯示對治福不生故於中其福者此
爲說相顯示福相法身故勝彼者顯示欲願
攝持故經言世尊是福聚即非福聚是故如
來說福聚及言須菩提佛法佛法者即非佛
法是名佛法者以此福聚及佛法爲攝取如
來福相法身中安立第一義爲隨順無爲得
名故相應三摩鉢帝及折伏散亂不復顯了
言甚多婆伽婆甚多修伽陀二語者顯示攝
心持心以攝自心故言受持爲他說者解釋

永樂北藏

金剛般若波羅蜜經論

第九二冊

句味故無量者過譬喻故阿僧祇者顯多故
已說欲住處竟

金剛般若波羅蜜經論卷上

金剛般若波羅蜜經論卷中

受六

無 著 菩 薩

造

隋南天竺三藏法師達摩笈多 譯

經曰須菩提於意云何須陀洹能作是念我得須陀洹果不須菩提言不也世尊何以故實無有法名須陀洹不入色聲香味觸法是名須陀洹佛言須菩提於意云何斯陀含能作是念我得斯陀含果不須菩提言不也世尊何以故實無有法名斯陀含是名斯陀含須菩提於意云何阿那含能作是念我得阿

那含果不須菩提言不也世尊何以故實無有法名阿那含是名阿那含須菩提於意云何阿羅漢能作是念我得阿羅漢果不須菩提言不也世尊何以故實無有法名阿羅漢世尊若阿羅漢作是念我得阿羅漢即爲著我人衆生壽者世尊佛說我得無諍三昧最爲第一世尊說我是離欲阿羅漢世尊我不作是念我是離欲阿羅漢世尊我若作是念我得阿羅漢世尊則不記我無諍行第一以須菩提實無所行而名須菩提無諍無諍行

論曰此下第五爲修道得勝中無慢如前略爲八種住處已下十二總名離障礙住處對治應知何者十二障礙一慢二無慢而少聞三多聞而小攀緣作念修道四不小攀緣作念修道而捨衆生五不捨衆生而樂隨外論散動六雖不散動而破影像相中無巧便七雖有巧便而福資糧不具八雖具福資糧而樂味懈怠及利養等九雖離懈怠利養而不能忍苦十雖能忍苦而智資糧不具十一雖具智資糧而不自攝十二雖能自攝而無教

授此中爲離慢故經言須陀洹能作是念我得須陀洹果不等此爲依義顯示對治我得慢故又復須陀洹能作是念者即爲說相顯示無慢故亦即是欲願攝持經言世尊實無有法不入色聲香味觸者此爲安立第一義若須陀洹如是念我得須陀洹果即爲有我想若有我想則爲有慢應知如是乃至阿羅漢亦爾上座須菩提自顯無諍行第一及離欲阿羅漢共有功德者以已所證爲令信故以無有法得阿羅漢及無所行故說無諍無

諍行此中即為安立第一義

經曰佛告須菩提於意云何如來昔在然燈佛所得阿耨多羅三藐三菩提法不須菩提言不也世尊如來在然燈佛所於法實無所得阿耨多羅三藐三菩提

論曰此下第六為不離佛出時依離障礙十二種中為離少聞故經言如來昔在然燈佛所得阿耨多羅三藐三菩提法不等謂彼佛出世承事供養時有法可取離此分別故依義等及對治等隨義相應應知

經曰佛告須菩提若菩薩作是言我莊嚴佛國土彼菩薩不實語何以故須菩提如來所說莊嚴佛土者則非莊嚴是名莊嚴佛土是故須菩提諸菩薩摩訶薩應如是生清淨心而無所住不住色生心不住聲香味觸法生

受六

三

心應無所住而生其心

論曰此下第七為願淨佛土依離障礙十二種中為離小攀緣作念修道故經言須菩提若菩薩作是言我莊嚴佛國土等若念嚴淨土者則於色等事分別生味著為離此故經

言是故須菩提諸菩薩摩訶薩應如是生清淨心而無所住不住色聲香味觸法等

經曰須菩提譬如有人身如須彌山王須菩提於意云何是身為大不須菩提言甚大世尊何以故佛說非身是名大身彼身非身是名大身

論曰此下第八為成熟衆生依離障礙十二種中為離捨衆生故經言須菩提譬如有人身如須彌山王如是等此何所顯示為成熟欲界衆生故彼羅睺阿脩羅王等一切大身

量如須彌尚不應見其自體何況餘者經言如來說為非體者顯示法無我故彼體非體者顯示法體無生無作故此即顯示自性與相及差別故

經曰佛言須菩提如恒河中所有沙數如是沙等恒河於意云何是諸恒河沙寧為多不須菩提言甚多世尊但諸恒河尚多無數何況其沙佛言須菩提我今實言告汝若有善男子善女人以七寶滿爾數恒沙數世界以施諸佛如來須菩提於意云何彼善男子善

女人得福多不須菩提言甚多世尊彼善男子善女人得福甚多佛言須菩提以七寶滿爾數恒河沙世界持用布施若善男子善女人於此法門乃至受持四句偈等為他人說而此福德勝前福德無量阿僧祇復次須菩提隨所有處說是法門乃至四句偈等當知此處一切世間天人阿脩羅皆應供養如佛塔廟何況有人盡能受持讀誦此經須菩提當知是人成就最上第一希有之法若是經典所在之處則為有佛若尊重似佛爾時須

菩提白佛言世尊當何名此法門我等云何奉持佛告須菩提是法門名為金剛般若波羅蜜以是名字汝當奉持何以故須菩提佛說般若波羅蜜則非般若波羅蜜須菩提於意云何如來有所說法不須菩提言世尊如來無所說法

論曰此下第九為遠離隨順外論散亂依離障礙十二種中為離樂外離散亂故經說四種因緣顯示此法勝異也一攝取福德二天等供養三難作四起如來等念經言須菩提

如恒河中所有沙數等者是攝取福德經言
須菩提隨所有處說是法門等者是天等供
養經言須菩提當知是人成就最上第一希
有等者是難作經言若是經典所在之處等
者是起如來等念於中說者爲他直說故授
者教授他故顯示此樂外論散亂對治法勝
異已於如是法中或起如言執義爲對治彼
未來罪故經言佛說般若波羅蜜則非般若
波羅蜜故如般若波羅蜜非波羅蜜如是亦
無有餘法如來說者爲顯此義故經言須菩

提於意云何如來有所說法不此顯示自相
及平等相法門第一義也

經曰須菩提於意云何三千大千世界所有
微塵是爲多不須菩提言彼微塵甚多世尊
須菩提是諸微塵如來說非微塵是名微塵
如來說世界非世界是名世界

論曰此下第十明色及衆生身搏取中觀破
相應行依離障礙十二種中爲離於影像相
自在中無巧便故經言須菩提於意云何三
千大千世界所有微塵如是等彼不限量攀

緣作意菩薩恒於世界攀緣作意修習故說三千大千世界於中爲破色身影像相故顯示二種方便一細作方便如三千大千世界所有微塵寧爲多不等二不念方便如經是諸微塵如來說若微塵是名微塵故爲破衆生身影像相故經言如來說世界非世界是名世界故於中世界顯衆生世也但以名身名爲衆生世不念名身方便即是顯示故彼影像相不復說細作方便也

經曰佛言須菩提於意云何可以三十二大

人相見如來不須菩提言不也世尊何以故如來說三十二大人相即是非相是名三十二大人相

論曰此下第十一明供養給侍如來依離障礙十二種中爲離不具福資糧故經言於意

受六

六

云何可以三十二大人相見如來不者顯示爲福資糧故親近供養如來時不應以相成就見如來云何見應見第一義法身故

經曰佛言須菩提若善男子善女人以恒河沙等身命布施若復有人於此法門中乃至

受持四句偈等爲他人說其福甚多無量阿僧祇

爾時須菩提聞說是經深解義趣涕淚悲泣
捫淚而白佛言希有婆伽婆希有修伽陀佛
說如是甚深法門我從昔來所得慧眼未曾
得聞如是法門何以故須菩提佛說般若波
羅蜜即非般若波羅蜜世尊若復有人得聞
是經信心清淨則生實相當知是人成就第
一希有功德世尊是實相者則是非相是故
如來說名實相實相世尊我今得聞如是法

門信解受持不足爲難若當來世其有衆生
得聞是法門信解受持是人則爲第一希有
何以故此人無我相人相衆生相壽者相何
以故我相即是非相人相衆生相壽者相即
是非相何以故離一切諸相則名諸佛佛告
須菩提如是如是若復有人得聞是經不驚
不怖不畏當知是人甚爲希有何以故須菩
提如來說第一波羅蜜非第一波羅蜜如來
說第一波羅蜜者彼無量諸佛亦說波羅蜜
是名第一波羅蜜

論曰此下第十二遠離利養及疲乏熱惱故不起精進及退失等依離障礙十二種中為離懈怠利養等樂味故經言須菩提若有善男子善女人以恒河沙等身命布施如是等於中身有疲乏心有熱惱以此二種於彼精進若退若不發此何所顯示如此捨爾許身自所有福不及此福云何以一身著懈怠等故而為障礙何故此中上座須菩提流淚而言我未曾聞如是等法門也以聞此勝福甚多過於捨無量身更不說餘勝福故若聞如

是勝福故發起精進已若於此法中生如義想為離此過故經言若復有人得聞是經信心清淨則生實相當知是人成就第一希有功德等即於如是實相中為離實相分別故經言是實相者即是非相如是等經言世尊我今得聞如是法門信解受持不足為難若當來世其有衆生得聞是法門信解受持是人則為第一希有如是等此何義為令味著利養過懈怠諸菩薩生慚愧故於未來正法滅時尚有菩薩於此法門受持故無人等取

及法取云何汝等於正法興時遠離修行不生慚愧也經言此人無我相人相衆生相壽者相者顯示無人取也我相即非相等者顯示無法取也經言何以故離一切諸相即名諸佛者顯示諸菩薩順學相諸佛世尊離一切相是故我等亦應如是學此等經文爲離退精進故說於中言若分別若信解者後句釋前句也受者受文字也持者持義也爲離不發起精進故經言若復有人得聞是經不驚不怖不畏等者以驚等故不發起精進也

於聲聞乘中世尊說有法及有空於聽聞此經時聞法無有故驚聞空無有故怖於思量時於二不有理中不能相應故畏更有別釋爲三種無自性故應知謂相生第一義等無自性故經言何以故須菩提如來說第一波羅蜜非第一波羅蜜者此有何義復說第二生慚愧處故言此法如是勝上汝等不應放逸於中以於餘波羅蜜中勝故名第一波羅蜜又經言如來說第一波羅蜜者彼無量諸佛亦說波羅蜜者此言顯示一切諸佛同說

第一是故名第一

經曰須菩提如來說忍辱波羅蜜即非忍辱
波羅蜜何以故須菩提我昔為歌利王割
截身體我於爾時無我相無衆生相無人相
無壽者相無相亦非無相何以故須菩提我
於往昔節節支解時若有我相衆生相人相
壽者相應生瞋恨須菩提又念過去於五百
世作忍辱仙人於爾所世無我相無衆生相
無人相無壽者相是故須菩提菩薩應離一
切相發阿耨多羅三藐三菩提心何以故若

心有住則為非住不應住色生心不應住聲
香味觸法生心應生無所住心是故佛說菩
薩心不住色布施須菩提菩薩為利益一切
衆生應如是布施須菩提言世尊一切衆生
相即非相何以故如來說一切衆生即非衆
生須菩提如來是真語者實語者如語者不
異語者須菩提如來所得法所說法無實無
妄語須菩提譬如有人入闇則無所見若菩
薩心住於事而行布施亦復如是須菩提譬
如人有目夜分已盡日光明照見種種色若

菩薩不住於事行於布施亦復如是

論曰此下第十三明忍苦依離障礙十二種中爲離不能忍苦故經言須菩提如來說忍辱波羅蜜等於中有二一能忍二離不能忍能忍有三一如所能忍二忍相三種類忍於中如所能忍以何相生忍處如忍差別顯示對治彼因緣故何者能忍謂達法無我故云何得顯示如經言如來說忍辱波羅蜜即非忍辱波羅蜜故云何應知忍相若他於已起惡等時由無有我等相故不生瞋想亦不於

鋒提波羅蜜中生有想於非波羅蜜中生無想此云何顯示經言如我昔爲歌利王割截身體我於爾時無有我等相及無相亦非無相等故何者種類忍亦有二種一極苦忍二相續苦忍此云何顯示經言須菩提我於往昔節節支解時若有我相應生瞋恨等云何相續苦忍經言須菩提又念過去於五百世作忍辱仙人等不忍因緣者有三種苦一流轉苦二衆生相違苦三乏受用苦於中經言是故須菩提菩薩應離一切相發阿耨多羅

三藐三菩提心等此爲顯示流轉苦忍因緣
對治發菩提心者以三種苦相故則不欲發
心故說應離一切相等此中一切相者爲顯
如是等三苦相也若著色等則於流轉苦中
疲乏故菩提心不生故經言不住色生心等
如前說不住非法者謂非法無我也於非法
及法無我中皆不住故爲成就彼諸不住故
說遮餘事經言應生無所住心何以故若有
心住即爲非住等經言須菩提菩薩爲利益
一切衆生應如是布施乃至一切衆生即非

衆生等此顯示對治衆生相違苦忍即爲一
切衆生而行於捨云何於彼應生瞋也由不
能無衆生及衆生想以此因緣故衆生相違
時即生疲乏故顯示人無我法無我等經言
須菩提如來是真語者等此何所顯示欲令
信如來故能忍於中真語者爲顯世諦相故
實語者爲顯世諦修行有煩惱及清淨相故
於中實者此行煩惱此行清淨故如語者爲
第一義諦相故不異語者爲第一義諦修行
有煩惱及清淨相故說此真語等已於此中

如言說性起執著爲遣此故經言須菩提如
來所得法所說法無實無妄語故無實者如
言說性非有故無妄者不如言說自性有故
經言須菩提譬如有人入闇如是等顯示乏
受用苦忍因緣對治若爲果報布施便著於
事而行捨施於彼喜於欲樂若受中不解出
離猶如入闇不知我何所趣彼喜欲樂亦爾
若不著於事而行布施如有眼丈夫夜過日
出見種種色隨意所趣應如是見彼無明夜
過慧日出已種種爾焰如實見之彼不知解

出離欲樂苦受故喜樂欲樂

經曰復次須菩提若有善男子善女人能於
此法門受持讀誦修行則爲如來以佛智慧
悉知是人悉見是人悉覺是人皆得成就無
量無邊功德聚須菩提若有善男子善女人
初日分以恒河沙等身布施中日分復以恒
河沙等身布施後日分復以恒河沙等身布
施如是捨恒河沙等無量身如是百千萬億
那由他劫以身布施若復有人聞此法門信
心不謗其福勝彼無量阿僧祇何況書寫受

持讀誦修行爲人廣說須菩提以要言之是經有不可思議不可稱量無邊功德此法門如來爲發大乘者說爲發最上乘者說若有人能受持讀誦修行此經廣爲人說如來悉知是人悉見是人皆成就不可思議不可稱無有邊無量功德聚如是人等則爲荷擔如來阿耨多羅三藐三菩提何以故須菩提若樂小法者則於此經不能受持讀誦修行爲人解說若有我見衆生見人見壽者見於此法門能受持讀誦修行爲人解說者無有是

處須菩提在在處處若有此經一切世間天人阿脩羅所應供養當知此處則爲是塔皆應恭敬作禮圍遶以諸華香而散其處

復次須菩提若善男子善女人受持讀誦此經爲人輕賤何以故是人先世罪業應墮惡道以今世人輕賤故先世罪業則爲消滅當得阿耨多羅三藐三菩提須菩提我念過去無量阿僧祇阿僧祇劫於然燈佛前得值八千四億那由他百千萬諸佛我皆親承供養無空過者須菩提如是無量諸佛我皆親承

供養無空過者若復有人於後世末世能受持讀誦修行此經所得功德我所供養諸佛功德於彼百分不及一千萬億分乃至算數譬喻所不能及須菩提若有善男子善女人於後世末世有受持讀誦修行此經所得功德若我具說者或有人聞心則狂亂疑惑不信須菩提當知是法門不可思議果報亦不可思議

論曰此下第十四離寂靜味依離障礙十二種中為離闕少智資糧故經言復次須菩提

若有善男子善女人能於此法門受持讀誦修行等此中為離三摩提攀緣顯示與法相應有五種勝功德一如來憶念親近二攝福德三讚歎法及修行四天等供養五滅罪何者如來憶念親近經言受持讀誦等如來以佛智知彼如來以佛眼見彼等於中受者習誦故持者不妄故若讀若誦者此說受持因故為欲受故讀為欲持故誦又復讀者習誦故持者總覽義故何者攝福德經言皆得成就無量無邊功德聚等何者讚歎法及修行

經言須菩提以要言之是經有不可思議不可稱量等此爲讚歎法於中不可思者唯自覺故不可稱者無有等及勝故經言此法門如來爲發大乘者說爲發最上乘者說者此成就不可稱義於中餘乘不及故最上煩惱障智障淨故最勝應知經言若有人能受持讀誦修行此經廣爲人說等者此爲讚歎修行於中如來知見成就無量功德聚者是總說也不可思不可稱不可量者解釋故如是人等則爲荷擔如來阿耨多羅三藐三菩提

者謂有負菩提重擔故經言須菩提若樂小法者則於此經不能受持讀誦修行爲人解說者謂聲聞獨覺乘者故經言若有我等見乃至受持無有是處者謂有人我見衆生而自謂菩薩者故何者天等六供養經言須菩提在在處處若有此經一切世間天人阿脩羅十所應供養等者於中以華鬘燒香熏香塗香末香衣蓋幢幡等供養恭敬禮拜右遶故名支提何者滅罪經言若善男子善女人受持讀誦此經爲人輕賤等故者此毀辱事有無

量門爲顯示此故說輕賤經言當得阿耨多
羅三藐三菩提者顯示滅罪故前所說以此
因緣出生無量阿僧祇多福者今當解釋彼
無量阿僧祇義應知威力者成熟熾然故多
者具足故於中經言須菩提我念過去無量
阿僧祇阿僧祇劫等者此顯示威力故即是
福聚威力以彼所有福聚遠絕高勝故此中
阿僧祇劫者乃至然燈佛故應知過阿僧祇
者更過前故親承者供養故不空過者常不
離供養故經言須菩提若有善男子善女人

於後末世有受持讀誦修行此經所得功德
若我具說者或有人聞心則狂亂如是等此
顯示多故或爲狂因或得亂因果應知此之
彼威力及彼多等何人能說是故經言須菩
提當知是法門不可思議果報亦不可思議
此顯示彼福體及果不可測量故
經曰爾時須菩提白佛言世尊云何菩薩發
阿耨多羅三藐三菩提心云何住云何修行
云何降伏其心佛告須菩提菩薩發阿耨多
羅三藐三菩提心者當生如是心我應滅度

一切衆生令入無餘涅槃界如是滅度一切衆生已而無一衆生實滅度者何以故須菩提若菩薩有衆生相人相壽者相則非菩薩何以故須菩提實無有法名爲菩薩發阿耨多羅三藐三菩提心者

論曰此下第十五於證道時遠離喜動依離障礙十二種中爲遠離自取故經言須菩提白佛言世尊云何菩薩發菩提心住修行等何故復發起此初時問也將入證道菩薩自見得勝處作是念我如是住如是修行如是

降伏心我滅度衆生爲對治此故須菩提問當於彼時如所應住如所修行如所應降伏心及世尊答當生如是心等又經言須菩提若菩薩有衆生等者爲顯我執取或隨眠故若言我正行菩薩乘此爲我取對治彼故經言須菩提實無有法名爲菩薩發阿耨多羅三藐三菩提心者
經曰須菩提於意云何如來於然燈佛所有法得阿耨多羅三藐三菩提不須菩提白佛言不也世尊如我解佛所說義佛於然燈佛

所無有法得阿耨多羅三藐三菩提佛言如是如是須菩提實無有法如來於然燈佛所得阿耨多羅三藐三菩提須菩提若有法如來得阿耨多羅三藐三菩提者然燈佛則不與我授記汝於來世當得作佛號釋迦牟尼以實無有法得阿耨多羅三藐三菩提是故然燈佛與我授記作如是言摩那婆汝於來世當得作佛號釋迦牟尼何以故須菩提言如來者即實真如須菩提若有人言如來得阿耨多羅三藐三菩提者是不實語須菩

提實無有法佛得阿耨多羅三藐三菩提須菩提如來所得阿耨多羅三藐三菩提於是中不實不妄語是故如來說一切法皆是佛法須菩提所言一切法一切法者即非一切法是故名一切法

論曰此下第十六求故授依離障礙十二種中為離無教授故經言須菩提於意云何如來於然燈佛所有法得阿耨多羅三藐三菩提不如是等又經言須菩提若有法如來得阿耨多羅三藐三菩提者然燈佛則不與我

授記汝於來世當得作佛等此有何意若菩提法可說如彼然燈如來所說者我於彼時便得菩提然燈如來則不授記言我得等以彼法不可說故我於彼時不得菩提是故與我授記此是其義應知又何故彼法不可說經言須菩提言如來者即實真如故如清淨文六故名爲如來以如不可說故作此說清淨如名爲真如猶如真金或言然燈如來所於法不得菩提世尊後時自得菩提爲離此取故經言須菩提若有人言如來得阿耨多羅三

藐三菩提者是人是不實語等故又經言須菩提如來所得阿耨多羅三藐三菩提於是中不實不妄語者顯示真如無二故云何不實謂言說故不妄者謂彼菩提不無世間言說故經言是故如來說一切法皆是佛法者此何義顯一切法法如清淨故如者遍一切法故此是其義又彼一切法法體不成就爲安立第一義故經言須菩提所言一切法一切法者即非一切法是名一切法故

金剛般若波羅蜜經論卷中

永樂北藏

金剛般若波羅蜜經論

第九二冊

音釋

睽胡鉤切割居曷切斷也

金剛般若波羅蜜經論卷下

受七

無 著 菩 薩

造

隋南天竺三藏法師達摩笈多 譯

經曰須菩提譬如有人其身妙大須菩提言
世尊如來說人身妙大則非大身是故如來
說名大身佛言須菩提菩薩亦如是若作是
言我當滅度無量衆生則非菩薩佛言須菩
提於意云何頗有實法名爲菩薩不須菩提
言不也世尊實無有法名爲菩薩是故佛說
一切法無衆生無人無壽者

論曰此下第十七爲入證道故經言須菩提
譬如有人其身妙大如是等顯示入證道時
得智慧故離慢云何得智有二種智故一攝
種性智二平等智若得智已得生如來家得
決定紹佛種此爲攝種性智得此已能得妙
身於中妙身者謂至得身成就身得畢竟轉
依故大身者一切衆生身攝身故若於此家
長夜願生既得生已便得彼身是名妙身平
等智復有五種平等因緣一麤惡平等二法
無我平等三斷相應平等四無希望心相應

平等五一切菩薩證道平等得此等故得爲
大身攝一切衆生大身故於彼身中安立非
自非他故經言世尊如來說人身妙大則非
大身是故如來說名大身等者於此妙身等
中安立第一義如是等是爲得智慧云何離
慢經言須菩提菩薩亦如是若作是言我當
滅度無量衆生等此云何可知若作是念我
滅度衆生我是菩薩應知此是慢者非實義
菩薩爲顯示此故經言是故佛說一切法無
衆生等若菩薩有衆生念則不得妙身大身

故

經曰須菩提若菩薩作是言我莊嚴佛國土
是不名菩薩何以故如來說莊嚴佛土莊嚴
佛土者即非莊嚴是名莊嚴佛國土須菩提
若菩薩通達無我無我法者如來說名真是
菩薩菩薩

論曰此下第十八上求佛地應知彼地復有
六種具足攝轉依具足一國土淨具足二無
上見智淨具足三福自在具足四身具足五
語具足六心具足爲國土淨具足三摩鉢帝

故經言須菩提若菩薩作是言我莊嚴佛國土是不名菩薩如是等此義爲於共見正行中轉故爲斷彼故安立第一義經言即非莊嚴是名莊嚴國土等又經言須菩提若菩薩通達無我無法者此言爲二種無我故謂人無法無我又經言如來說名菩薩菩薩者爲於彼二種無我中二種正覺故此等云何顯示若言我成就即爲人我取莊嚴國土者是法我取此非菩薩經曰須菩提於意云何如來有肉眼不須菩

提言如是世尊如來有肉眼佛言須菩提於意云何如來有天眼不須菩提言如是世尊如來有天眼佛言須菩提於意云何如來有慧眼不須菩提言如是世尊如來有慧眼佛言須菩提於意云何如來有法眼不須菩提言如是世尊如來有法眼佛言須菩提於意云何如來有佛眼不須菩提言如是世尊如來有佛眼佛言須菩提於意云何如恒河中所有沙佛說是沙不須菩提言如是世尊如來說是沙佛言須菩提於意云何如一恒河

中所有沙有如是等恒河是諸恒河所有沙數佛世界如是世界寧為多不須菩提言彼世界甚多世尊佛告須菩提爾所世界中有衆生若干種心住如來悉知何以故如來說諸心住皆為非心住是名為心住何以故須菩提過去心不可得現在心不可得未來心不可得

論曰此下第二為無上見智淨具足故經言須菩提於意云何如來有肉眼不如是等於中二種一為見淨二為智淨如來不唯有慧

眼為令知見淨勝故顯示有五種眼若異此則唯求慧眼見淨故於中略說有四種眼謂色攝第一義諦攝世諦攝一切種一切應知攝色攝復有二種謂法界修果此為五眼麤境界故是初色攝第一義智力故世智不顛倒轉是故第一義諦攝在先於中為人說法若彼法為彼人施設此智說名法眼一切應知中一切種無功用智說名佛眼此等名為見淨如經須菩提於意云何如恒河中所有沙如是等此為智淨於中心住者謂三世心

若干種者應知有二種謂染及淨即是共欲
心離欲心等世者說過去等分於此二中安
立第一義故經言如來說諸心住皆爲非心
住乃至過去心不可得等於中過去心不可
得者已滅故未來者未有故現在者第一義
故爲應知中證故安立見爲教彼彼衆生寂
靜心故安立智於此智淨中說心住即非心
住如是見淨中何故不說眼即非也以一住
處故見智淨後安立第一義故初亦得成就
經曰須菩提於意云何若有人以滿三千大

千世界七寶持用布施是善男子善女人以
是因緣得福多不須菩提言如是世尊此人
以是因緣得福甚多佛言如是如是須菩提
彼善男子善女人人以是因緣得福德聚多
須菩提若福德聚有實如來則不說福德聚
福德聚
論曰此下第三爲福自在具足故經言須菩
提於意云何若有人以滿三千大千世界等
於中亦安立第一義故經言須菩提若福德
聚有實等

經曰須菩提於意云何佛可以具足色身見
不須菩提言不也世尊如來不應以色身見
何以故如來說具足色身即非具足色身是
故如來說名具足色身佛言須菩提於意云
何如來可以具足諸相見不須菩提言不也
世尊如來不應以具足諸相見何以故如來
說諸相具足即非具足是故如來說名諸相
具足

論曰比下第四為身具足故於中復有二種
一為好具足二為相具足為好具足故經言

須菩提於意云何佛可以具足色身見不如
是等於中亦以安立第一義故經言如來說
非具足等為相身具足故經言須菩提於意
云何如來可以具足諸相見不如是等

經曰佛言須菩提於意云何汝謂如來作是
念我當有所說法耶須菩提莫作是念何以
故若人言如來有所說法則為謗佛不能解
我所說故何以故須菩提如來說說法者
無法可說是名說法

論曰比下第五為語具足故經言須菩提於

意云何汝謂如來作是念我當有所說法耶如是等於中安立第一義故經言如來說法說法者等

經曰爾時慧命須菩提白佛言世尊頗有衆生於未來世聞說是法生信心不佛言須菩提彼非衆生非不衆生何以故須菩提衆生衆生者如來說非衆生是名衆生

論曰此下第六心具足於心具足中復有六種一爲念處二爲正覺三爲施設大利法四爲攝取法身五爲不住生死涅槃六爲行住

淨應知於心具足中爲念處故經言世尊頗有衆生於未來世聞說是法生信心不如是

等此處於諸衆生中顯示如世尊念處故彼非衆生者第一義故非不衆生者世諦故是人即爲希有第一者顯示說第一義是不共

及相應故此文如前說

經曰佛言須菩提於意云何如來得阿耨多羅三藐三菩提耶須菩提言不也世尊世尊無有少法如來得阿耨多羅三藐三菩提佛言如是如是須菩提我於阿耨多羅三藐三

菩提乃至無有少法可得是名阿耨多羅三藐三菩提復次須菩提是法平等無有高下是名阿耨多羅三藐三菩提以無衆生無人無壽者得平等阿耨多羅三藐三菩提修一切善法得阿耨多羅三藐三菩提須菩提所言善法善法者如來說非善法是名善法論曰此下第二於彼心具足中爲正覺故經言須菩提於意云何如來得阿耨多羅三藐三菩提耶如是等於中無有法者爲離有見過已顯示菩提及菩提道故彼復顯示菩提

有二種因緣謂阿耨多羅語故二藐三佛陀語故於中經言無有少法如來得阿耨多羅者此爲阿耨多羅語故此顯示菩提自相故菩提解脫相故彼中無微塵許法有體是故亦不可得亦無所有應知經言復次須菩提是法平等者爲三藐三佛陀語故顯示菩提者人平等相於中平等者以菩提法故得知是佛此中經言無有高下者顯示一切諸佛第一義中壽命等無高下故經言以無衆生無人無壽者得平等阿耨多羅三藐三菩提

者顯示菩提於生死法平等相故經言一切善法得阿耨多羅三藐三菩提者顯示菩提道故經言所言善法善法者如來說非善法故名善法等者此安立第一義相故

經曰須菩提三千大千世界中所有諸須彌山王如是等七寶聚有人持用布施若人以此般若波羅蜜經乃至四句偈等受持讀誦爲他人說於前福德百分不及一一分不及一百千萬分不及一歌羅分不及一數分不及一優波尼沙陀分不及一乃至算數譬喻

所不能及須菩提於意云何汝謂如來作是念我度衆生耶須菩提莫作是見何以故實無有衆生如來度者佛言須菩提若有實衆生如來度者如來則有我人衆生壽者相須菩提如來說有我者則非有我而毛道凡夫生者以爲有我須菩提毛道凡夫生者如來說名非生是故言毛道凡夫生

論曰此下第三於彼心具足中爲施設大利法故經言二千大千世界中所有諸須彌山王如是等於中爲安立第一義教授故經言

汝謂如來作是念我度衆生耶如是等又經
言如來則有我人衆生壽者相等者此有何
義如來如爾焰而知是故若有衆生如來則
爲有我取若實無我而言有我取爲離此著
故經言須菩提如來說有我者則非有我如
是等是故但小兒凡夫有如是取故經言須
菩提毛道凡夫生者如來說名非生是故言
毛道凡夫生故

經曰須菩提於意云何可以相成就得見如
來不須菩提言如我解如來所說義不以相

成就得見如來佛言如是如是須菩提不以
相成就得見如來佛言須菩提若以相成就
觀如來者轉輪聖王應是如來是故非以相
成就得見如來爾時世尊而說偈言

若以色見我 以音聲求我 是人行邪道
不能見如來 彼如來妙體 即法身諸佛
法體不可見 彼識不能知

須菩提於意云何如來可以相成就得阿耨
多羅三藐三菩提耶須菩提莫作是念如來
以相成就得阿耨多羅三藐三菩提

論曰此下第四於彼心具足中為攝取法身故經言須菩提於意云何可以相成就得見如來不如是等於中初偈顯示如所不應見不可見故云何不可見諸見世諦故是人行邪靜者定名為靜以得禪者說名寂靜說名寂靜者故又復禪名思惟修故於中思者意所攝修者識所攝言寂靜者即說覺及識此世諦所攝應知彼不能見者謂彼世諦行者第二偈顯示如彼不應見及不應因緣謂初分次分於中偈言以法應見佛者法者謂真

如義也此何因緣偈言導師法為身故以如為緣故出生諸佛淨身此不可見但應見法故彼不應見復何因緣故不可見以彼法真如相故非如言說而知唯自證知故不如言說者非見實不能知故為顯示此義故偈言法體不可見彼識不能知故於此住處中得顯示以法身應見如來非以相具足故若爾如來雖不應以相具足見應相具足為因得阿耨多羅三藐三菩提為離此著故經言須菩提於意云何如來可以相成就得阿耨多

羅三藐三菩提須菩提莫作是念等者此義明相具足體非菩提亦不以相具足為因也以相是色自性故

經曰須菩提汝若作是念菩薩發阿耨多羅三藐三菩提心者說諸法斷滅相須菩提莫作是念菩薩發阿耨多羅三藐三菩提心說諸法斷滅相何以故菩薩發阿耨多羅三藐三菩提心者於法不說斷滅相須菩提若善男子善女人以滿恒河沙等世界七寶持用布施若有菩薩知一切法無我得無生法忍

此功德勝前所得福德須菩提以諸菩薩不取福德故須菩提白佛言世尊菩薩不取福德佛言須菩提菩薩受福德不取福德是故菩薩取福德

論曰此下第五於彼心具足中為不住生死涅槃故於中有二一為不住涅槃二為不住生死為不住涅槃故須菩提汝若作是念菩薩發阿耨多羅三藐三菩提心者說諸法斷滅相如是等於中經言於法不說斷滅者謂如所住法而通達不斷一切生死影像法於

涅槃自在行利益衆生事此中爲遮一向寂靜故顯示不住涅槃若不住涅槃應受生死苦惱爲離此著顯示不住流轉故經言須菩提若善男子善女人以滿恒河沙等世界七寶持用布施如是等於中經言無我無生法忍者何義如來於有爲法得自在故無彼生死法我又非業煩惱力生故無生故名無我無生者此中云何得顯示如說攝取餘福尚於生死中不受苦惱何況菩薩於無我無生法中得忍已所生福德勝多於彼經言須菩

提以諸菩薩不取福德者此顯示不住生死故若住生死即受福聚又經言須菩提白佛言世尊菩薩不取福德者此有何義以世尊於餘處說應受福聚故經言佛言須菩提菩薩受福德不取福德是故菩薩取福德者此顯示以方便應受而不應取故受者說有故取者修彼道故如福聚及果中皆不應著經曰須菩提若有人言如來若去若來若住若坐若卧是不解我所說義何以故如來者無所至去無所從來故名如來

論曰此下第六於心具足中爲行住淨於中復有三種一威儀行住二名色觀破自在行住三不染行住應知爲威儀行住故經言須菩提若有人言如來若去若來等於中行者謂去來住者謂餘威儀

經曰須菩提若善男子善女人以三千大千世界微塵復以爾許微塵世界碎爲微塵阿僧祇須菩提於意云何是微塵衆寧爲多不須菩提言彼微塵衆甚多世尊何以故若是微塵衆實有者佛則不說是微塵衆何以故

佛說微塵衆則非微塵衆是故佛說微塵衆世界如來所說三千大千世界則非世界是故佛說三千大千世界何以故若世界實有者則是一合相如來說一合相則非一合相是故佛說一合相佛言須菩提一合相者則是不可說但凡夫之人貪著其事何以故須菩提若人如是言佛說我見人見衆生見壽者見須菩提於意云何是人所說爲正語不須菩提言不也世尊何以故世尊如來說我見人見衆生見壽者見即非我見人見衆生

見壽者見是名我見人見衆生見壽者見須
菩提菩薩發阿耨多羅三藐三菩提心者於
一切法應如是知如是見如是信如是不住
法相何以故須菩提所言法相法相者如來
說即非法相是名法相

受七

十二

論曰此下第二爲破名色身自在行住故經
言須菩提若善男子善女人以三千大千世
界微塵如是等於中細末方便乃無所見方
便等此破如前說應知經言彼微塵衆甚多
世尊者是細末方便經言若是微塵衆實有

者佛則不說是微塵衆等者是爲無所見方
便此說有何義若微塵衆第一義是有者世
尊則不說非聚經言佛說微塵衆則非微塵
衆是故佛說微塵衆以此聚體不成故若異
此者雖不說亦自知是聚何義須說經言如
來所說三千大千世界等者此是無所見方
便此破名身亦如前說應知於中世界者謂
明衆生世故彼唯名身得名故經言若世界
實有者則是一合相者於中爲並說若世界
若微塵界故有二種搏取謂一搏取及差別

搏取衆主類衆生世界有者此爲一搏取微塵有者此爲差別搏取以取微塵衆集故經言如來說一合相則非一合相等者此上座須菩提安立第一義故世尊爲成就如是義故經說一合相者即是不可說等此何所顯示世言說故有彼搏取第一義故彼法不可說彼小兒凡夫如言說取非第一義已說無所見方便破義永說無所見中入相應三昧時不分別謂如所不分別及何人何法何方便云何不分別此後具說經言須菩提若人

如是言佛說我見等以等顯示如所不分別云何得顯示如外道說我如來說爲我見故安置人無我又爲說有此我見故安置法無我若有彼我見是見所攝如是觀察菩薩入相應三昧時不復分別即此觀察爲入方便經言須菩提菩薩發阿耨多羅三藐三菩提心者此顯示無分別人經言於一切法者此顯示於何法不分別經言應如是知如是見如是信者此顯示增上心增上智故於無分別中知見勝解於中若智依止奢摩他故知

依止毗鉢舍那故見此二依止三摩提故勝
解以三摩提自在故解內攀緣影像彼名勝
解經言如是不住法相者此正顯示無分別
經言所言法相法相者如來說即非法相是
名法相者此顯示法相中不共義及相應義
如前已說如是一切住處中相應三摩提方
便亦爾應知欲願及攝散二種如前所說更
無別義是故不復說其方便
經曰須菩提若有菩薩摩訶薩以滿無量阿
僧祇世界七寶持用布施若有善男子善女

人發菩薩心者於此般若波羅蜜經乃至四
句偈等受持讀誦爲他人說其福德勝彼無
量阿僧祇

云何爲人演說而不名說是名爲說

一切有爲法 交七 如星翳燈幻 十四 露泡夢電雲

應作如是觀

論曰此下第三爲不染行住於中二種一爲
說法不染二爲流轉不染爲說法不染故經
言須菩提若有菩薩摩訶薩以滿無量阿僧
祇世界七寶如是等此何所顯示以有如是

大利益故決定應演說如是演說而無所染
經言云何爲人演說而不名說是名爲說者
此有何義顯示不可言說故不演說彼法有
可說體應如是演說若異此者則爲染說以
顛倒義故又如是說時不求信敬等亦爲無
染說法爲流轉無染故經說偈言一切有爲
法如星翳燈幻等此偈顯示四種有爲相一
自性相二者所住味相三隨順過失相四隨
順出離相於中自性相者共相見識此相如
星應如是見何以故無智闇中有彼光故有

智明中無彼光故人法我見如翳應如是見
何以故以取無義故識如燈應如是見何以
故渴愛潤取緣故熾然於中著所住味相者
味著顛倒境界故彼如幻應如是見何以故
以顛倒見故於中隨順過失相者無常等隨
順故彼露譬喻者顯示相體無有以隨順無
常故彼泡譬喻者顯示隨順苦體以受如泡
故若有受皆是苦以三苦故隨有應知彼苦
生故是苦苦破滅故是壞苦不相離故是行
苦復於第四禪及無色中立不苦不樂受以

勝故於中隨順出離相者隨順人法無我以攀緣故得出離故說無我以為出離也隨順者謂過去等行以夢等譬喻顯示彼過去行以所念處故如夢現在者不久時住故如電未來者彼麤惡種子似虛空引心出故如雲如是知二世行轉生已則通達無我此顯示隨順出離相故

經曰佛說是經已長老須菩提及諸比丘比丘尼優婆塞優婆夷菩薩摩訶薩一切世間天人阿脩羅乾闥婆等聞佛所說皆大歡喜

信受奉行

論曰偈言

若聞如是義 於大乘無覺 我念過於石
究竟無因故 下人於深法 不能覺及信
世人多如此 是故法荒廢

金剛般若波羅蜜經論卷下

永樂北藏

金剛般若波羅蜜經論

第九二冊